

# Il meglier sistem è quel cun la pli vasta acceptanza

Il sistem electoral actual dal Grischun cuntrafa parzialmain a la constituziun e sto perquai vegnir adattà

DA MARTIN CABALZAR/FMR

■ **Tenor sentenza dal Tribunal federal cuntrafa il sistem actual d'eleger il Cussegl grond en Grischun a la constituziun. Per quest motiv sto el vegnir adattà e revedì già en vista a las proximas elecziuns parlamentaras da l'onn 2022.** En consideraziun da questa situaziun urgenta e brisanta ha la regenza grischuna surdà al professor ordinari per dretg statal a l'Universitad da Turitg *Andreas Glaser* l'incumbensa da far in parairi davart models electorals giuridicamain pussaivels. La FMR ha discurre cun *Andreas Glaser* davart la problematica. Professor *Glaser* ha passentà intgins onns da sia giuventetgna a Sagogn e discurre e scriva perfetgmain rumantsch sursilvan.

**Tge premissas ston esser ademplidas per ch'in sistem electoral saja gist e confirm a la constituziun?**

In sistem electoral sto correspunder a l'egualitad d'elecziun. Las premissas varieschan tenor proporz, maiorz e sistem maschadà. Oravant tut per il proporz ha il Tribunal federal creà l'egualitad da success che permetta che mintga vusch saja era represchentada tras in sez el parlament.

**Ins na po dentant betg pretender a priori ch'in sistem – maiorz u proporz – saja pli gist e democratic che l'auter?**

Na, il Tribunal federal exprima bain ina preferenza per il proporz sco il sistem il pli democratic. El ha dentant renconuschì ch'era il maiorz u in sistem maschadà è confirm a la constituziun sche las relaziuns chantunales giustifitgeschan quai.

**Il Tribunal federal ha constatà ch'il sistem actual d'eleger il parlament chantunal tenor maiorz na cuntrafetschia betg totalmain a la constituziun, anzi mo parzialmain. Co è quai da chapir?**

Quai munta en emprima lingia ch'ins sto adattar il sistem electoral en ils circuls gronds, concret en tals cun dapli che 7 000 abitants svizzers. Là n'è il maiorz betg pli lubì. U ch'ins introducescha là il proporz u ch'ins sparta quests circuls.

## «Nagin maiorz en circuls gronds»

**La regenza ha proponì in sistem maschadà da maiorz e proporz a basa dals circuls, dentant era cun sparter ils circuls gronds. N'è quai betg simplamain in cumpromiss marsch?**

La regenza è sco i para s'orientada fitg stretg a la situaziun actuala dad ina vart ed a las recumandaziuns dal Tribunal federal per ina reforma uschè minimala sco pussaivla da l'autra.

**Ils adversaris dal proporz pretendan ch'il pievel veglia eleger chaus e betg partidas. N'è quai pia betg pussaivel tar il proporz?**

Mo per part. Il proporz s'orientescha ferm a las partidas. Las sutgas vegnan repartidas tenor las partidas. Pir en segunda lingia pon elements persunals giugar ina rolla tras quai ch'ils electurs san cumular e panaschar.

**Entant ch'ils adherents dal proporz pretendan che las partidas pitschnas pateschian sin donn e cust da las partidas grondas, pretendan ils adherents dal maiorz ch'il proporz favuriseschia ils centers ed indebleschia las regiuns periferas. Constat quai?**

Il maiorz favurisescha surtut persunalitads fermas, savens dependa il success dentant era qua da la partida, en mintga cas han partidas pitschnas strusch ina schanza. Schebain la periferia patescha è dentant surtut ina dumonda dals circuls electorals e schebain quels han ina garanzia da sez. Quai na dependa pia betg directamain dal sistem electoral.

## «Preferir chaus u partidas?»

**Oriundamain aveva la regenza favurì l'introducziun dal proporz. Tegnend quint da las maioritads politicas en il Cussegl grond ha ella uss dentant midà opiniun e favuriseschia in sistem maschadà e magari cumplitgà da proporz e maiorz, dentant er cun sparter circuls electorals existents. Ha ella la finala survegnì tema da l'agen curaschi e fatg in enclin opportunistic per cementar il status quo?**

La midada dal sistem electoral vegn decidida tenor las reglas democraticas existents. I fassess perquai bain nagin senn sche la regenza proponiss in sistem che avess nagina schanza en il parlament. Natiralmain na fiss er per il parlament er betg prudent da proponer in sistem ch'avess nagina schanza tar il pievel.

**Vegniss in sistem maschadà da proporz e maiorz tenor Vossa opiniun in summa tolerà dal Tribunal federal e dal Parlament federal che sto la finala ratifitgar la midada constituziunala dals chantuns?**

Il sistem maschadà sco el vegn proponì da la regenza stuess cun gronda probabilitad vegnir acceptà da las autoritads federalas. Ils cas da precedenza da Appenzell Dadora ed Uri pledan en favur da quest sistem. Tar in tribunal san ins dentant mai...



## «In sistem electoral è adina in combat da pussanza»

Andreas Glaser, professor ordinari per dretg statal

**Il Cussegl grond ha da tractar il messadi che definescha la finala sia atgna cumposiziun. El n'ha consequentamain betg grond interess da far midadas ed è perquai era pregiuditgà en chaussa. N'è quai betg in pau problematic?**

Gea, igl è propi problematic ch'il Cussegl grond fa ina lescha en atgna chaussa. Ils parlamentararis favuriseschan in sistem tenor il qual els èn elegids. Il pievel controlla dentant il parlament tras il referendum. En il cas dals cas pudess il pievel er midar il sistem tras in iniziativa. Quai mitigias la rolla dal parlament.

**Las elecziuns dal parlament en la finala primarmain ina dumonda politica ed il suveran grischun ha confirmà ils ultims decennis repetidamain a l'urna il sistem actual a l'urna. Èsi tuttina legitim sche las dretgiras ignoreschan la voluntad dal pievel e sa maschaidan en ils fatgs politics da la legislativa cun vulair dictar il sistem d'elecziun?**

Il Tribunal federal è i fitg lunsch cun sias sentenzias. Intgins experts manegian ch'el saja i memia lunsch e ch'el fetschia politica. Il parlament federal ha dentant renunzià l'onn passà ad ina correctura dal Tribunal federal ed ha uschia legitimà la giurisprudenza.

**Adversaris dal proporz fan valair che quel na prendia betg resguard sin il svilup istoric e na resguardia betg la varietad geografica, economica, culturala, confessiunala e sociala da noss chantun. Constat quai u n'è quai betg simplamain ina vercla per giustifitgar l'atgna pussanza?**

Sco ditg, l'aspect regional dependa oravant tut dals circuls electorals. Quels restassan uschè u uschia pli u main en lur cumposiziun tradiziunala. Entaifer ils circuls electorals pudess dentant capitar (tenor il model C), che la repartiziun dals mandats en in circulo na correspundess betg a la voluntad dals electurs da quest circulo ma vegniss influenzà dal resultat da l'entir chantun.

## «Mantegnair ils cumins è ina cuntradiziun»

**Avant paucs onns ha il chantun Grischun abolì ils circuls (cumins) ed istituì da nov 11 regiuns. Uss vul ins tuttina mantegnair ils circuls sco unitads electorales enstagl da resgu-**

**ardar las regiuns. N'è quai betg in anacronissem nunchapibel e cuntradictoric ed in pass enavos?**

Vus avais raschun: Il mantegniment dals anteriurs circuls mo anc sco circuls electorals è en vista da la reforma territoriala ina gronda cuntradiziun en plirs models proponids, sco en C ed E. Il Tribunal federal ha dentant acceptà l'argumentaziun en favur dals circuls electorals, malgrà l'aboliziun dals cumins.

**Tant adherents sco adversaris dal proporz e maiorz fan adina puspè valair arguments altruistics ed idealistics per lur varianta favurizada. N'è quai betg la finala in pur combat per pussanza, influenza e prestige?**

La definiziun dal sistem electoral è adina in combat da pussanza, la finala vai per perder e gudagnar mandats en il parlament.

**La cumissiun per strategia e politica statala ha renvià il sbos a la regenza. Considerais Vus quai sco ina schanza da reponderar anc ina giada da radent l'entira chaussa e la finala chattar ina soluziun pli prospectiva e persistente e che tegna era quint dals svilups futurs?**

## «Evitar in mantun stgaglias»

Questa renviada è bain da chapir sco signal da vulair integrar er ils adversaris dal model E en la discussiun.

**Tge capita sch'il pievel refusa la finala la varianta proponida dal Cussegl grond en vista a las elecziuns da 2020? Ston regenza u Cussegl grond en quest cas far diever dal dretg d'urgenza?**

Sch'il pievel refusass la proposta en la votaziun fiss strusch pli pussaivel da repeter la procedura ad uras avant las elecziuns da 2022. Lura stuess ins efectivamain enchaminar la via dal dretg d'urgenza. Quai fiss ina chaussa unica per las elecziuns da 2022. Ins stuess mantegnair il sistem vegl tant sco lubì dal Tribunal federal, pia maiorz cun sparter intgins circuls electorals existents.

**Giuditgais Vus la proposta da la fracziun da la PCD da suttametter al pievel tant la varianta dal model E sco quella dal model C sco soluziun salomonica per evitar il dilemma?**

Quella proposta minimass il privel da star avant in mantun da stgaglias sco er la pressiu sin il pievel d'acceptar ina varianta. Ins fiss in zichel pli da manivel a l'ideal da cuntanscher ina ferma legitimaziun. Il problem è ch'i pudess puspè vegnir stretg...

**Tge sistem electoral è tenor Voss avis il pli gist ed il pli adattà per las relaziuns grischunas?**

Il meglier sistem electoral fiss quel che vegniss acceptà d'ina largia maioritad dal pievel e che avess tras quai ina ferma legitimaziun.